



DEO OPTIMO MAX.
UNI ET TRINO,

VIRGINI DEIPARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS,
*manè discutienda, in Scholis Medicorum, die Jovis vigesima-quinta
mensis Februarii, anno Domini M. DCC. XLV.*

M. JOSEPHO LALLEMANT,
Doctore Medico, Præside.

An Actio Muscularis à solis Spiritibus ?

I.



CORPORIS humani partes solidæ triplici actione gaudent, Elasticâ, Tonicâ & Musculari. Harumce tertiam tantummodò hodiè expendemus. Definiri potest Vis illa contractiva ab Animâ partim dependens, Musculis solis propria, quâ ipsi nituntur ad decurtationem. 1º. Dicimus Vim illam ab Animâ dependere; idque, ut ab actione Elasticâ distinguatur, quæ omnibus corporis partibus solidis innata est, quæque pro vario distractionis & tensionis gradu remittitur aut intenditur, & in mortuis viget æquè ac vivis corporibus. 2º. Musculis solis propria est: sic etiam differt ab actione Tonicâ, quæ non Musculos spectat tantùm, sed cunctas etiam partes solidas sensu donatas, 3º. Tandem, nostrâ illâ Actione Musculi nituntur ad decurtationem; nam, stricte loquendo, Musculi decurtatio est Actionis Muscularis effectus tantummodò accidentalis: nec, ut illa perficiatur, necesse est, Musculum reverà decur-

tari. Undè meritò concludimus actionem illam nihil aliud esse quàm nifum in Musculo ad decurtationem.

Jam verò, antequàm istius causa efficiens inquiratur, Musculi structura primò venit accuratè perspicienda. Musculus primo aspectu dici potest moles carnea artuum motibus perficiendis, vel functionibus exercendis, vel tandem partibus continendis, firmandis, constringendis à Naturà comparata. At ipsius structuram altius scrutemur. Adfint scalpellum, microscopia, patientia, dexteritas. En quicque Musculus in infinitos propè minores Musculos dividitur, seu fibrarum fasciculos. Unicuique, sui nervorum furculi, suæ vasorum sanguiferorum propagines, suum denique peculiare involucrum à communi totalis Musculi capsulâ enatum. Ex his fasciiculis quem volueris ulteriùs divide: alios adhuc habes Musculos fibris perpendicularitèr incidentibus variè inter se discriminatos. *Hi verò iterum, (Boërhaawe Inst. Med. N^o. 393.) & qui nascuntur ab illis, in minores semper similes maximo; & quidem divisio hæc procedit eò usque, ut tandem in incredibilem adeò subtilitatem abeat, quæ omnem omnino imaginationis vim exuperet. Ultimus autem ille Musculus vocatur Fibra Muscularis, quarum unità adunatione Musculus propriè dictus fit.* Fibræ illæ Musculares tantæ tenuitatis sunt, ut oculorum acutioribus etiàm microscopiis armatorum aciem eludant. Vulgò tamèn creduntur componi ex infinito propè vesicularum numero, quibus Authores varii variam conformationem assignarunt. Inter illos, vesiculas musculares ex infinitis circuli segmentis æqualibus constari placuit Johan. Bernoulli. Figuram ipsis Rhomboidalem adscripsit Alphons. Borelli. Nos verò, cum multis, volumus eas ad figuram Ellyptico-Sphæroideam accedere, ac per majorem diametrum inter se invicem alligari; quod quidè ex dicendis haud absurdè, ut opinor, inducitur.

I I.

UT Musculus nitatur ad decurtationem, certè necesse est abbreviationem moliantur ipsius fibræ, & quidè longitudinales, non verò transversæ, ut voluerunt Verheyen & Bergerus. Sed Corpus quodvis moveri nequit, quin ab alio moveatur. Cùm autèm ex suprà memoratis partibus, nulla sit per se motu donata; necessariò assignandum corpus aliud externum, qualecumque sit, quod in illas impingat; & suum ipsis motum possit communicare. Corpus autèm illud debet esse tenuissimum, mobile, fluidum, subtilissimum, Animæ imperiis subditum, si fas ità loqui, ipsi vicinum, ac, ut ità dicam, quasi vicarium. Tunc, Animâ jubente, corpus istud in supradictas fibræ Muscularis vesiculas irrumpens, illas secundum minorem diametrum necessariò dilatabit, ut corporibus Ellypticis solemne est. At crescente minori diametro, major minuetur. Cùm verò per hypothefim vesicularum supponantur secundum majorem diametrum inter se catenatæ, ac proinde illarum majorum diametrorum summa totam metiatur fibræ longitudinem, summa illa diametrorum non potest decrefcere, quin decrefcat & tota fibra. Sic etiàm de cæteris, ac tandem de totali Musculo dicendum est.

Quodnam autèm erit in corpore fluidum talibus muniis exequendis idoneum? En præstò sunt duo; Sanguis, Fluidum Nerveum. Nunc iterum vel ab alterutro, vel ab utroque Muscularis Actio repetenda. Adfit primò Sanguis. Fluidus est, mobilis: at 1^o. non ille tantæ tenuitatis est, qui intimam vesicularum cavitatem possit permeare. 2^o. Non adeò subtilis, ut in ipso temporis puncto, tam subitos motus citò præciseque exequatur. 3^o. tandem, non est voluntari subditus. Ergò sanguis non est causa efficiens motus Muscularis. Secundò Fluidum Nerveum expendamus. 1^o. Corpus est fluidissimum, tenuissimum, celerrimum. 2^o. Illud quasi animæ vicinum, ipseque suffragans; 3^o. Ligatis Nervis cujusvis partis, perit continuò sensus motusque in Musculis, quibus prospiciebant. Ergò Fluidum Nerveum est causa efficiens motus Muscularis. Verùm de his jam nulla, aut saltèm rara apud Physiolo-

3
gos disputatio. Ut igitur propositum Theſeos noſtræ ſcopum aſſequamur, probandum incumbit ſolum Fluidum Nerveum eſſe cauſam efficientem motus Muſcularis, nec ſanguinem huic ullo modo concurrere.

I I I.

FA T E M U R profectò ſanguinem Muſculorum Actioni poſſe conducere eo nomine tantum, quod Spirituum Animalium ſicùt & caterorum humorum fons eſt & origo; vel etià in quantum vaſorum ſuorum Oſcillatione, eoſdem ſpiritus per nervorum ductus in Muſculos agit ac protrudit; vel tandè quatenus ſero ſuo, quod ubiquè diffundit, Muſculares fibras humectat, laxat, nutrit, & lubrificat. Nihilominus tamèn falſum eſt ſanguinis præſentiam in Muſculis neceſſariò requiri, ut illorum actio perficiatur, proindeque illum eſſe cauſam huius efficientem, imò vel efficientis proximè auxiliatricem.

Sed, obijciunt adverſarii, ligatà in cane vivo Aortà descendente infrà emulgentium exitum, privantur illicò ſenſu motuque partes canis poſticæ: Ergò neceſſaria in Muſculis, ad iſorum motum, ſanguinis præſentia. Minimè. Non à ſanguinis abſentià ſubita illa motus ſenſusque ſeria. Non in Muſculis ſanguis deſideratur, ſed in arteriis Spinalem medullam comitantibus, Lumbaribus ſcilicèt, & Sacris, quæ dictam Spinæ medullam motu ſuo comprimentes, in Crurales & Iſchiaticos Nervos contentum fluidum, ut antea, propellant. Alioquin undè repetenda foret illa ſenſus abolitio, niſi ab intermiſſo ſpirituum animalium affluxu? Inſtant autèm ipſi pertinaciùs. Etiamsi Aortam ut ſuprà ligaveris, ſanguis videtur remeare per venas ſpinales. Ergò non ſolæ Lumbarès & Iliacæ ſanguine ſuo ſpinalem medullam alluunt. Ergò ſunt & aliæ arteriæ, quarum oſcillationibus ſpiritus poſſunt in Muſculos propelli. Ergò non à ſpirituum, ſed à ſanguinis abſentià oriunda illa Muſculorum inertia. Benè quidèm: verùm Anatomiam, ut par eſt, ſedulò conſulamus.

Secundùm totam longitudinem ductus vertebralis, intrà ligamentum vaginale & duram menyngem descendunt Sinus Spinales venoſi numerò duo, anteriùs ille, poſteriùs hic. Sinus iſti diſtincti videntur in tot internodia, quot ſunt in ſpinà vertebræ; quæ tamen internodia mutuam habent inter ſe commercium. Ad unamquamque vertebrarum articulationem adſunt circuli venoſi, qui ſuos habent todidèm congeneres circulos arterioſos. Circuli illi venoſi ſanguinem ſuum in ſupradictos Sinus effundunt, undè per venas Spinales deſertur in Intercostales, ac indè in venam Azygos. Porrò ex hypotheſi fateor circulos venoſos vertebrarum lumborum & oſſis ſacri nullum ſanguinem ſuppeditare ſuprà laudaris Sinibus: ſed adſunt circuli aliarum vertebrarum, colli nempe & dorſi, qui priorum ſuppleant deſectum. Nam, ut ſuprà notavimus, Sinus Spinales, etiamsi videantur interrupti, nihilominus tamèn ſunt jugi communicatione continui. Ergò nihil mirum, ſi in propoſito caſu ſanguine turgæant venæ Spinales. Ergò non indè concludendum, alteras neceſſariò adeſſe arterias, quæ medullam Spinalem comitentur, & pulſatione ſua ſpirituum motui faveant.

I V.

V E R U M, ne quid deſit probationi noſtræ, tolle Aortæ ligaturam. Utramque tantum hinc & indè liga cruralem; en citò redeunt ſenſus motuſque in partibus antea paralyticis. Ne una tamen ad eas appellit ſanguinis guttula; ſed fibra circà ſpinalem medullam vaſorum oſcillatio, proindeque redivivus ſpirituum in partes circulus. Nec fortè dixeris in ſecundo iſto caſu poſt horas aliquot partium tandè redire paralyſim. Non ſanè ſtupendum, ſi negato in partibus inferioribus ſanguinis circuitu, ſuperiores cruore ultrà modum turgæant, ac tandem obſtruantur. Obſtructis ſemèl vaſis ſpinæ ſanguiferis, jam tardior in illis ſanguinis motus, ac deniquè ſucceſſu temporis nulla circulatio, nulla pulſatio, nulla ſpirituum in nervos excretio, nulla Actio Muſcularis.

ALIUNDE quorsum istud conduceret sanguinis cum Spiritibus in Musculo conjugium? Quenam forent illius ad contractionem munia? Nūm, ut excitatū statim ebullitione, vel factā copulā nescio quā explosivā pulveris pyrii æmulā, vel tandem attractione Newtonianā, è fermentatis, disruptis, aut valde compressis sanguinis partibus erumpat aer quidam subtilissimus, qui subitā dilatatione Musculum agat in contractionem? Jamdudum obsolevit indigesta illa ridicularum opinionum farrago. Sed dicet aliquis: quamvis ratione demonstrari nequeat sanguinis necessitas ad Actionis Muscularis negotium; cum tamen sola spirituum intrusio in ovales fibrarum loculos tantis contractionibus edendis vix sufficere videatur, admitti potest illorum expansio à circulationis calore oriunda. At 1^o. sola nostra Spirituum in ovales vesiculas intrusio sufficit ad omnes motus Musculares perficiendos. Ad id enim requiritur tantum, ut ovales illæ vesiculæ ad ultimam usque periodum citò facilèque dilantur. Porro in hypothesi supponuntur, & reipsa sunt tenuissimæ, adeoque vel minimā trusione inflantur. Alioquin, si ad sui dilatationem proposito auxilio indigerent, in attollendis, v. g. gravissimis oneribus, ut augetur spirituum vis, necessariò augeri deberet, in ipso instanti, & circulationis calor: quodquidem nec rationi, nec experientiæ consonat. 2^o: Antequam admittatur illa spirituum expansio, probandum est sanguinem spiritibus esse calidiorem: quod etiam nequit faciliè demonstrari. Nèdum igitur sanguinis præsentia Musculorum actioni faveat, hanc ipsi nocivam esse Natura ipsa videtur indicare. Et certè 1^o. intrā contractionem sanguis è contracto Musculo in venas indè oriundas mutato tramite retrofluit. 2^o. Rationi & experientiæ consentaneum est Musculi contracti molem decreescere: quod quidem fieri nequit, quin sanguine suo vacuetur. 3^o. Volunt quidam, intrā contrahendum, Musculum ruborem amittere; novum adhuc profectò sanguinis absentia argumentum. Adedque ex his omnibus ritè concludimus,

Ergò Actio Muscularis à solis Spiritibus.

DOMINI DOCTORES DISPUTATURI.

M. Benjamin-Ludovicus Lucas de Laurembert.

M. Ludovicus-Guillelmus le Monnier, è Regiâ Scientiarum Academia, & Rei Herbariæ Professor.

M. Jacobus-Benignus Winslow, Censor Regius, Regiæ Scientiarum Academiæ, Societatisque Regiæ Berolinensis socius, Teutonice Linguae Regiæ interpres, in Horto Regio Anatomæ & Chirurgiæ Professor ac Demonstrator.

M. Leander Peaget.

M. Josephus-Exuperius Bertin, Supremi Valachiæ & Moldaviæ Principis Medicus ordinarius, & Regiæ Scientiarum Academiæ socius.

M. Antonius Pepin, Regis Consiliarius & in Portu Bressensi Medicus Primarius.

M. Ludovicus-Alexander Vierlhard, Consiliarius Medicus Regis ordinarius in ejus Castellato.

M. Joannes-Ludovicus-Livinus Baude de Lacloy, Bibliothecæ Facultatis Prefectus.

M. Joannes Herment, Medicus Regis ordinarius.

Proponebat Parisiis, JULIANUS HINGANT, San-Briocensis; Saluberrimæ Facultatis Medicinæ Parisiensis Baccalaureus, A. R. S. H. 1745, à sextâ ad meridiem.